



SURUHANJAYA PILIHAN RAYA MALAYSIA

KENYATAAN MEDIA

Bil. 39 / 2022

URUSAN PILIHAN RAYA UMUM KE-15 (PRU KE-15) BAHAGIAN PILIHAN RAYA PARLIMEN P.017 PADANG SERAI

1. Suruhanjaya Pilihan Raya Malaysia (SPR) telah menerima Writ Pilihan Raya yang dikembalikan oleh Pegawai Pengurus Bahagian Pilihan Raya Parlimen P.017 Padang Serai **pada 16 November 2022 (Rabu)**, berhubung kematian calon Pakatan Harapan mendiang **Karupaiya A/L Mutusami**.
2. Sehubungan itu, SPR telah mengadakan Mesyuarat Khas pada hari ini, **18 November 2022 (Jumaat)** dan menetapkan bahawa satu PRU Ke-15 Bahagian Pilihan Raya Parlimen P.017 Padang Serai perlu diadakan semula. Oleh yang demikian proses pengundian di Bahagian Pilihan Raya Parlimen P.017 Padang Serai, **TIDAK AKAN DIADAKAN pada 19 November 2022 (Sabtu)**.
3. Bagi maksud menjalankan PRU ke-15 Bahagian Pilihan Raya Parlimen P.017 Padang Serai, SPR telah membuat keputusan untuk menetapkan tarikh-tarikh penting seperti yang berikut:

Tarikh Keluar Writ : 18 November 2022 (Jumaat)
Hari Penamaan Calon : 24 November 2022 (Khamis)
Hari Mengundi Awal : 3 Disember 2022 (Sabtu)
Hari Mengundi : 7 Disember 2022 (Rabu)

4. Tempoh berkempen ditetapkan **13 hari** bermula selepas pengisytiharan calon-calon yang bertanding pada **24 November 2022 (Khamis)** sehingga pukul **11.59 malam, 6 Disember 2022 (Selasa)**.
5. Urusan permohonan semua kategori undi pos luar negara dan dalam negara **secara dalam talian** dibuka daripada **18 November 2022 (Jumaat)** dan ditutup pada **22 November 2022 (Selasa)**.
6. Bagi menjalankan proses PRU Ke-15 Bahagian Pilihan Raya Parlimen P.017 Padang Serai, SPR telah melantik **YBhg. Dato' Haji Abdul Bari bin Abdullah, Pegawai Daerah Kulim** sebagai **Pegawai Pengurus Pilihan Raya** dan dibantu oleh **enam (6) orang Penolong Pegawai Pengurus**. Manakala bagi tujuan pemantauan aktiviti kempen pilihan raya sepanjang tempoh berkempen, SPR akan menubuhkan **dua (2) Pasukan Penguat Kuasa Kempen Pilihan Raya (PP-KPR)**.
7. Bagi maksud PRU Ke-15 Bahagian Pilihan Raya Parlimen P.017 Padang Serai, **Dewan Kompleks Sukan Kulim Hi-Tech, Kulim** akan digunakan sebagai **Pusat Penamaan Calon (PPC)** dan **Pusat Penjumlahan Rasmi Undi (PPRU)**.

8. Bagi maksud Hari Penamaan Calon PRU Ke-15 Bahagian Pilihan Raya Parlimen P.017 Padang Serai pada 24 November 2022 (Khamis), calon-calon yang layak yang sah dinamakan sebelum ini dikehendaki hadir ke Pusat Penamaan Calon (PPC) bagi tujuan cabutan undi untuk menentukan giliran pada kertas undi.
9. Manakala, bakal-bakal calon baharu yang ingin bertanding dalam PRU Ke-15 Bahagian Pilihan Raya Parlimen P.017 Padang Serai, hendaklah menyerahkan Kertas Penamaan Calon yang telah lengkap diisi dan disemak oleh Pejabat Pegawai Pengurus oleh calon atau penyokong atau pencadangnya semasa Hari Penamaan Calon di Pusat Penamaan Calon yang telah ditetapkan oleh SPR.
10. SPR akan meneruskan penyiaran secara langsung proses-proses pilihan raya menerusi live streaming bagi Pusat/Saluran Mengundi yang terpilih di laman *Facebook* SPR sebagaimana yang dilaksanakan pada pilihan raya sebelum ini.
11. Seramai **2,468 orang petugas** akan dilantik bagi mengendalikan proses PRU Ke-15 Bahagian Pilihan Raya Parlimen P.017 Padang Serai. Manakala, sebanyak **46 buah pusat mengundi biasa** yang mengandungi **230 tempat mengundi/saluran** dan **satu (1) pusat mengundi awal bagi pengundian yang mengandungi dua (2) tempat mengundi/saluran awal** akan digunakan. Keseluruhan jumlah pusat mengundi adalah sebanyak **47 buah dengan 232 tempat mengundi/saluran**. PRU Ke-15 Bahagian Pilihan Raya

Parlimen P.017 Padang Serai ini dianggarkan memerlukan peruntukan sebanyak **RM 1.6 juta**.

12. **Daftar Pemilih Pilihan Raya (DPPR)** yang akan digunakan untuk PRU Ke-15 Bahagian Pilihan Raya Parlimen P.017 Padang Serai adalah daftar pemilih terkini sehingga **Daftar Pemilih Tambahan Bulan Ogos 2022 yang dikemaskini sehingga 9 Oktober 2022**. DPPR bagi PRU Ke-15 Bahagian Pilihan Raya Parlimen P.017 Padang Serai ini mengandungi **seramai 133,867 orang pemilih** yang terdiri daripada **133,776 orang pengundi biasa, 76 orang polis dan 15 orang Pengundi Tidak Hadir Luar Negara**. DPPR bagi PRU Ke-15 Bahagian Pilihan Raya Parlimen P.017 Padang Serai dijadualkan akan mula dijual pada **23 November 2022 (Rabu)**.
13. Para pengundi boleh membuat **semakan maklumat pengundian** untuk mengetahui maklumat **pusat mengundi, saluran mengundi dan nombor bilangan** mereka melalui portal semakan di pautan **<https://mysprsemak.spr.gov.my>** atau **hubungi Hotline SPR di talian 03-88927018 / 03-88880040** atau melalui **aplikasi MySPR Semak**. Semakan boleh dibuat mulai **23 November 2022 (Rabu)**.
14. SPR juga menyarankan semua yang terlibat dan hadir pada hari mengundi, hari penamaan calon serta semua urusan pilihan raya untuk memakai pelitup separuh muka, mengamalkan penjarakan fizikal dan sentiasa mensanitasi tangan.

15. Bagi menggalakkan pengundi supaya keluar menunaikan tanggungjawab mereka pada hari mengundi, SPR akan melaksanakan kempen `**Jom Kita Undi**` melalui pelbagai saluran media termasuk di media elektronik, media sosial, hebahan melalui siar raya dan pemasangan kain rentang di lokasi-lokasi strategik tumpuan awam dan tempat-tempat lain yang bersesuaian.

Sekian dan terima kasih.

TAN SRI ABDUL GHANI SALLEH

Pengerusi

Suruhanjaya Pilihan Raya Malaysia

18 November 2022 / 23 Rabiulakhir 1444H